

Eskja hf.
Strandgata 39
735 Eskifirði

Egilsstaðir, 28. júlí 2022
UST202203-025/F.Æ.
08.10.02

Efni: Reglubundið eftirlit þann 5.7.2022 – fiskimjölsverksmiðja Eskju hf. Eskifirði

Þann 5. júlí sl. fór fram eftirlit í fiskimjölsverksmiðju Eskju hf. á Eskifirði. Í samræmi við 57. grein reglugerðar nr. 550/2018 um losun frá atvinnurekstri og mengunarvarnaeftirlit sendist meðfylgjandi eftirlitsskýrsla.

Sex frávík voru opin þegar eftirlitið fór fram. Frávikin varða:

1. Gr. 2.17 í starfsleyfi. „Niðurstöður frárennismælinga sem gerðar voru í mars 2020 sýndu að COD væri of hátt. Ekki hefur verið gerð önnur mæling á árinu, sbr. grein 3.2 í starfsleyfi, og ekki vitað til þess að einhverjar úrbætur hefðu verið gerðar á búnaðinum eftir mælinguna.“

- *Skýrsla dags. 17.2.2022 staðfestir að mælingar á COD, fitu og svifögnum í frárennsli eru innan þeirra marka sem sett eru í starfsleyfi.*

- *Til stendur að endurtaka frárennismælingu á makrílvertíð í sumar (2022).*

- *Ráðgert er að endurnýja rör fyrir inndælingu á sjó sem er nýttur til kælingar í verksmiðjunni. Verkið er á áætlun og eru áætluð verklok 1. október 2022.*

- *Hreinsunarkari verður bætt við á árinu.*

Í ljósi ofantalins er **frávikinu lokað**. Farið verður yfir úrbæturnar í seinna eftirliti ársins.

2. Gr. 5.2 í starfsleyfi. „Heildarúttekt á losun mengandi efna í frárennsli verksmiðjunnar er ekki lokið.

Unnið er skv. samþykktri úrbótaáætlun, en þar kemur fram að stefnt sé að mælingu á sild og kolmunna á árinu 2023. Áætluð verklok eru fyrir 1. nóvember 2023.

3. Gr. 4.1 í starfsleyfi. „Umhverfismarkmið fyrirtækisins skulu endurskoðuð á fjögurra ára fresti.“

Í samþykktri úrbótaáætlun kemur fram að ráðgert sé að koma á fót umhverfisstjórnunarkerfi fyrir fiskimjölsverksmiðju Eskju þar sem verður komið til móts við kröfur laga og reglugerða á Íslandi. Þar verða sett inn endurskoðuð umhverfismarkmið. Áætluð verklok skv. úrbótaáætlun voru 30. maí 2022.

Ekki er lengur ráðgert að koma á fót umhverfisstjórnunarkerfi fyrir fiskimjölsverksmiðju Eskju. Þess í stað er hafin vinna við heildar umhverfisstjórnunarkerfi fyrir Eskju. Búið er að vinna drög að slíku kerfi.

Rekstraraðila er bent á að upplýsa þarf Umhverfisstofnun um allar breytingar á samþykktri úrbótaáætlun, og eftir atvikum fá samþykki stofnunarinnar fyrir þeim. Ekki er ljóst hvenær vinna við umhverfisstjórnunarkerfi Eskju lýkur. Umhverfisstofnun óskar eftir uppfærðri úrbótaáætlun.

4. Gr. 4.4 í starfsleyfi. „Viðbragðsáætlun fyrirtækisins þarf að uppfæra.“

Viðbragðsáætlun, dags. 9.3.2022, hefur verið send Umhverfisstofnun og er frávikinu því lokað.

5. Gr. 4.5 í starfsleyfi. „Mengunaróhapp var ekki tilkynnt til eftirlitsaðila þegar þéttir í dælu í soðkjarnatæki í verksmiðjunni bilaði sem varð til þess að talsvert af soði fór í sjóinn.“

Í samþykktri úrbótaáætlun kemur fram að stefnt sé að frekara eftirliti með dælum og öðrum búnaði. Framangreint verði sett inn í innra eftirlit umhverfisstjórnunarkerfis. Upplýsingagjöf til yfirvalda verði bætt strax. Áætluð verklok vegna innra eftirlits eru 31. maí 2022.

Vinnu við umhverfisstjórnunarkerfi er ekki lokið. Hins vegar hefur verklag verið bætt og er eftirlit með dælum og öðrum búnaði orðið ítarlegra og viðhald er nú skráð.

Rekstraraðila er bent á að upplýsa þarf Umhverfisstofnun um allar breytingar á samþykktri úrbótaáætlun, og eftir atvikum fá samþykki stofnunarinnar fyrir þeim. Umhverfisstofnun óskar eftir uppfærðri úrbótaáætlun.

6. Gr. 20.1 og 20.2 í reglugerð nr. 884/2017 um varnir gegn olíumengun frá starfsemi á landi. Á fimm ára fresti skal þrýstiprófa niðurgrafnar lýsislagnir og allar löndunarlagnir fyrir lýsi og olíu. Í samþykktri úrbótaáætlun kemur fram að mælingu sé lokið en beðið sé eftir skriflegri staðfestingu. Áætluð verklok eru 20. mars 2022.

Enn er beðið eftir vottorði.

Rekstraraðila er bent á að upplýsa þarf Umhverfisstofnun um allar breytingar á samþykktri úrbótaáætlun, m.a. ef ekki er staðið við skilafresti. Umhverfisstofnun óskar eftir að rekstraraðili sjái til þess að umbeðin gögn berist sem allra fyrst eða skili inn uppfærðri úrbótaáætlun.

Ein ábending var sett fram í eftirlitinu, er varðar:

1. Mögulega hættu á að efni komist út í umhverfið. Á gólfi þar sem saltsýra og vítissóði eru geymd, er niðurfall sem ekki var hægt að staðfesta að væri lokað. Rekstraraðila er bent á að kanna hvort hætta sé á að efni sem berast í niðurfallið komist út í umhverfið og bregðast við ef svo er.

Eitt frávik kom fram í eftirlitinu, er varðar:

1. Gr. 3.3 í starfsleyfi. Rekstraraðili skal færa grænt bókhald í samræmi við ákvæði reglugerðar nr.851/2002, um grænt bókhald. Rekstraraðili skal færa útstreymisbókhald í samræmi við reglugerð nr. 990/2008, um útstreymisbókhald. Skila skal niðurstöðum græns bókhalds og útstreymisbókhalds fyrir 1. maí ár hvert.

Umrædd gögn bárust Umhverfisstofnun í byrjun júní og er frávikinu því lokað.

Umhverfisstofnun óskar eftir tímasettri áætlun um úrbætur á eldri frávikum nr. 3, 5 og 6, í samræmi við 58. grein reglugerðar nr. 550/2018 og að áætlunin berist stofnuninni eigi síðar en 19. ágúst 2022.

Virðingarfyllst,

Freyr Ævarsson
Sérfræðingur

Kristín Kröyer
Sérfræðingur